

Serial No. 05
Regular. List

KA IING KASHARI BA HAKHLIEH DUH KA JYLLA MEGHALAYA
HA SHILLONG

CrI.A.No.22/2019

Tarik jong ka hukum: 15.03.2022

Spelling Kurbah

Pyrshah.

State of Meghalaya

Hakhmat:

Justice Sanjib Banerjee, Nongbishar ba ha khlieh duh ba donburom.

Justice W.Diengdoh, Nongbishar ba donburom.

Ki Muktiar:

Na ka bynta u nongmudui : Mr. P.Yobin, Legal Aid Counsel

Na ka bynta ki nongshahmudui : Mr. K.Khan, PP bad
Mr. S.Sengupta, Addl.PP

- | | | |
|-----|--|---------|
| i) | La shah ne em ban pynmih kaiphod ha ki kot
buh jingkyrmaw(journals) kam ain bad kiwei | Hooi |
| ii) | La shah ne em ban pynmih ha ki lad pathai khubor | Hooi/Em |

Ka Rai: (Katkum u Nongbishar ba ha khlieh duh, ba donburom) (Da ka ktien)

Ha shwa ban ai ia ka hok jingkyrpad mukotduma jong u nongmudui, donkam ban khmih shwa ia ka rai jingpynrem.

2. Ka rai uxor pyrshah kaba la dep myn ha ka 30 tarik u Iaiong 2019, ka dei ka nuksa kaba bha tam ban pyni kumno ka jingshim rai kam dei ban long. Na ki 36 Sla kiba la dep pynlut ha kaban poi sha ka rai pynkut kaba long ba, u nongshahmudui hangne, u la leh ia ka kam pyniap brieve bad u la dei ban shah pynshitom katkum ba ain, kumta ym palat na ki 6 lain lah ban ong kumno ban peit bad bishar ia kane ka kam lane ban pyrkhath ba ha kano ka rukom ka iingkashari kan pynndonkam ia ka bor jabieng jong ka,ban peit ia ka jingshisha khnang ba yn lah ban poi sha kaba kut.

3. Ki 30 sla ei ei ba sha khmat jong ka rai ki pyni aiu ba ki nongsakhi bapher bapher ki batai, ki tiar sakhi aiu kiba lah ban pynshisha bad halor ka jingshah pynngat/shahkynnoh kaba kumno la uxor pyrshah ia u nongmudui. Haden ka jingtreishitom kaba khraw, ka iingbishar ka la

iaid shakhmat ban buh jingthoh ia kine harum kiba pyni ia ka jingpyndonkam ia ka bor jabieng, khlem da khein ia ka jingiar jong kata:

“36. Ki dak mynsaw kiba don ha ka met jong uba la khlad kiba dei na ka daw ka jingpyndonkam da ka tiar ot banep,kata ruh ha ka bynta bakongsan kum u ryndang, ki pyni ba u nongshahmudui u la thombor da ka jingmut ban pyniap syndon ia uta uba la shahpyniap. ...”

Ki ar sla kiba bud ki pyni ia kaei kaba la sot na ka rai jong ka Iingbishar Supreme Court shuwa ba kan paw ka bor jabieng ka iingbishar halor ki lai lain kiba hakhmat jong ka paragraph kaba 37:

“37.Ha kane ka mukotduma ba mynta,u nongshahmudui u la pynmynsaw na ki dkhot met ba kongsan jong ka met,kata ruh da ka tiar kum ka ‘dao’ kaba long ka tiar banep bad ba khia,ha kaba u nongshahmudui u tip bha ba lada thombor ia u briew u bym don tiar ialeh,kan pynmynsaw bad ka lah ruh ban lam sha ka jingiap....”

4. Ka sien kaba ar kaba pyni ia ka jingpyndonkam ia ka bor jabieng, ka pyni ia kajuh ka jingsngew ba ki lai lain ba sdang jong ka paragraph 36 ki pyni. Ka paragraph ba 37 ka don sa kawei pat ka mat ba khiathew ba la sot na ka rai jong ka Iingbishar Supreme Court shwa ba ki lai lain jong ka jingsynniang u nongbishar kin paw na kine harum:

“... Ka sakhi ba la ioh na ki doktor ki pynshisha ia ki sakhi ba la ai da ki nongsakhi. U nongshahmudui u don ka jingtip ba ka tiar kaba u pyndonkam (**Material Exhibit-1**) kaba long kaba nep bha ka dei ka tiar kaba shyrkhei ne kaba ma bad lada pyndonkam ia ka, kan poi sha ka jingiap, kumta,kam pyni ba kan dei ka kam ba don jingpyndom ne jingpynshit.”

5. Watla ia ki jingkren pathar ba la shu ong ba ka ktien phareng kadei tang ban lait, ka dei ka jingban biang ia kaba la thoh ha ki lai lain ba sdang jong ka paragraph ba 36 bad ki lai lain ba sdang jong ka paragraph ba 37, lait noh ba kata ka kam jingpyndom ne pynshit ba la kdew bad la pynkut noh da kaba ong ba, tang namar ba la pyndonkam ia ka tiar bashyrkhei ym shem la don kano kano ka jingpyndom ne pynshit. Kawei kam iabud na kawei pat: bad, ym shem la don da kawei pat ka lad ban iamir halor ka phang,ba hato ka kam beain ba la leh kadei kawei na ka

jingpyniap briew (murder) ne ka jingleh ia ka kam ba lam sha ka jingiap (culpable homicide), khlem da mut ban poi sha ka jingpyniap, ne balei.

6. Ka paragraph ba 38 jong ka rai ka kdew ia ki jubab ba la ai da u nongmudui ha ka por ba tohkit ia u hapoh ka Kyndon ain (Section) ba 313 jong ka Code of Criminal Procedure, 1973 shuwa ka bynta ba treikam jong ka rai ka paw ha ka paragraph ba 39 hangta:

“39. Haba khmih ia ka jingkren bad jingthoh sakhi ba la ai da ki nongsakhi bad haba peit ia ka rai ba la ai da ka Iingkashari Supreme Court badon burom ,nga don ka jingmut baskhem ba ka jingtian bishar ka la pynlong ia ka mokotduma pyrshah u nongshahmudui **hapoh ka Kyndon ain 302 IPC** ba kan iaid palat ia kano kano syrngiew jong ka jingartatien, bad u la shah rai pynrem (*sic*).”

7. Ka jingpynkut ia kano kano ka rai, hapoh kaei kaba la mang iangi da ka Riti Shynshar ka Ri kaba shynshar katkum ki kyndon ka ain, dei ban pynshongnongrim halor ki daw. Ka daw ka pyni ia ka jingpyndonkam bor jabieng halor ki mat bad ka jingkhmih bniah ia ki jingshisha pyrshah ia ki ain ba la pyntreikam. Kumban shu pyrkhath, ki daw ki pynmih ia ka lynti jong ka jingshim rai na ki jingshisha ba hakhmat sha ki jingpyrkhat, bad kumta ia ka rai ban pynkut la shim namarkata lyngba ka ain ba la pyntreikam.

8. Ka rai uxor pyrshah, ha la marwei ka duna ha ki daw bad kumta ka pyni ia ka jingbym pyndonkam ia ka bor jabieng ne ia ka jingkhlem pyntreikam ia kano kano ka bor jingmut jingpyrkhat.

9. U nongmudui u shaniah ha ka sakhi ba la iohi da ki khmat bad jingkren jong la kumno kumno, lai ngut ki nongsakhi kiba ong ba, u ba la khlad u la iai pyndom shi pyndom ia u nongmudui ha kato ka miet 14 tarik u Nohprah 2016, bad u nongmudui namarkata u la bitar shla. Ka long jingshisha ba u nongmudui u la rah ia ka *wait lyngkut* ne *dao*, ka tiar ba nep kum ka wait iapom, bad u dang don hapdeng ka jingtalain ia kata ka tiar pyrshah ia u ban sa shah pyniap bad la iarap noh da u nongsakhi uba la wan hapdeng ban knieh noh ia ka tiar na u nongmudui bad buh

ia ka hapoh. Hynrei, ka jingsakhi ka pyni shai ba u nongshahpyniap u dang iai bteng ban pyndom ia u nongmudui, ha kaba la mih ka jingiakynad hapdeng jong ki bad u nongmudui u la shim biang ia kata ka tiar ha ka sien ba ar bad mait ia ka ryndang u nongshahpyniap bad kata ka jingmysaw bajur ka lam sha ka jingiap. Hynrei, ka dei ka jingbatai khlem kylla ktien ka jong ki nongsakhi ba hadien ba u nongmudui u la dep ban mait ia u nongshahpyniap, u la shim ia ka met u para lajong, uba dei u nongshahpyniap, u pyrshang ban nion ia ka kti halor ka jaka ba shah mait, da ka jingthmu ban pynsangeh ne ban pynduna ia ka jingphlei ka snam bad hadien pat, u iam khlem jingtngen.

10. La don shibun ki nongtrei kiba la trei halor ka project ha shnong Amkhrieh ha u Nohprah 2016, kynthup ia u nongmudui bad u para jong u, u nongshahpyniap. Ha ka janmiet 14 tarik u Nohprah 2016, katba katto katne ngut ki brierw ki dang ia shet na ka bynta ka jingbamja miet ha ka jaka ba ki sah, u nongshahpyniap u iai pyndom bad pynshrai ia u nongmudui. U nongmudui u la bitar bad u lah leit ban thombor ia u nongshahpyniap, hynrei watla u nongmudui u lah shah pynjaijai ha kaba nyngkong, hynrei haba u nongshahpyniap u dang iai pyndom bad pynshrai ia u, u nongmudui um lah shah shuh. U nongmudui u la leit ban tur sha la u para, bad la mih ka jingiakynad bad kumta u nongmudui u la shim ia ka *dao* bad talain ia ka shaphang ka ryndang u para jong u. Kane kam dei kaei kaei ba lah don jingthmu lypa. Kane ka mih namar ka daw ba shah pyndom/pynshrai bad ba iakynad. Kata ka *dao* ka dei kaba lah don lypa hajan. Ym don kano kano ka dak ban pyni ba don ba wanrah ia kata *dao* da ka jingthmu ban ai ha u nongmudui ban pyndonkam ia ka pyrshah ia u nongshahpyniap.

11. Watla ka jingbishar ka pynshai ia ka jingshisha ba ia kata ka *dao* la knieh noh na ka kti u nongmudui ha ka sien ba nyngkong, hynrei hadien u la shim biang ia kata ka tiar ban mait ia u nongshahpyniap bad kata ka pyni ia ka jingdon lypa ka jingthmu ba sha lyndet, kum kata ka jingpynshai dei ban kyntait. Ka lah ban long kaba shisha ba lada u PW 7 u Raju, uba la knieh ia

kata ka *dao* na u nongmudui, u lah bret ia ka kham pajih, u nongmudui u lah ban shim da kano kano ka tiar ba don hajan ban bom ia u nongshahpyniap da kata; ka la shu jia ba u Raju u buh ia kata ka *dao* ha kajuh ka jaka ba u nongmudui u la shim ia ka ha ka sien kaba nyngkong, ba u nongmudui u ioh ka lad ban shim biang ia kata ka tiar ha ka por ba u la shrai bad bitar shla na ka daw ka jingshah pyndom shi pyndom ha la u para watla u la kyrpad ia u ba un sangeh.

12. Ka kyndon ain ba 299 jong ka Indian Penal Code, 1860 ka batai ba ka jingleh ia ka kam ba lam sha ka jingiap ka dei ka kam ba lah don lypa ka jingthmu ban pyniap ne thmu ban pynmysaw jur ha ki dkhot met ka ba lah ban lam sha ka jingiap, ne ba la leh ia ka da ka jingtip ba kan ialam sha ka jingiap. Ka kyndon ain ba 300 jong ka Penal Code ka sdang da ka dkhot ba kyrpang bad ka ong ba ka jingleh ia ka kam ba lam sha ka jingiap ka lah ban long ka kam pyniap briew, lada ia kane ka kam ba poi sha ka jingiap ka dei ba la leh da ka jingthmu ban pyniap ne da ka jingthmu ban pynmysaw jur ha ki dkhot met kiba u nongthombor u tip shai ba kan ialam sha ka jingiap, ne lada leh ia kata ka kam da ka jingthmu ban pynmysaw jur bad kata ka jingpynmysaw ka long kaba biang ban lam sha ka jingiap ne lada u nongthombor uba leh ia ka kam u tip shai ia ka jingma ba don ba kan lah beit ban ialam sha ka jingiap ne jingpynmysaw ban ialam sha ka jingiap.

13. Ka dkhot kyrpang ba kdew ha basdang jong ka Kyndon ain ba 300 jong ka Penal Code kan sa bud hadien ha kum kita ki kyndon kiba la mang. Na ki saw tylli ki ba la mang kyrpang, kaba nyngkong ka dei,ba lada u briew um lah ban teh lakam ialade haba shah pyndom ne shah pynshrai bad ka lam sha ka jingiap jong uta uba pyndom ne ka jingiap ba dei da kaba shu kum bakla ne jia ryngkhat. Kum kata ka mat kyrpang ba nyngkong la ker da ki katto katne ki kyndon kiba nym iahap na ka bynta kane ka jingthmu ba mynta. Ka mat kyrpang ba ar ka iadei bad ka jingiada ialade, bad kane ruh kam don jingiadei bad kane ka jingjia hangne. Ka mat kyrpang ka ba

lai ka iadei bad u riew shakri paidbah uba trei na ka bynta ka jingkieushaphrang ka jingbishar hok bad kum kata ka jingmang kyrpang ym shym la pyndonkam ia kata ha kane ka mukotduma. Ka mat kyrpang ba san ruh, ym lah ban pyndonkam. U nongmudui u shaniah ha ka mat kyrpang ba saw kaba ong kumne harum:

“Mat Kyrpang 4. – Ka jingleh ia kam ba lam sha ka jingiap (Culpable homicide) kam dei ka jingpyniap briew lada la leh ia kata ka kam khlem don kano kano ka jingmut ne jingthmu lypa ha ka jingiashoh ba kynsan na ka daw ka jingkieu ka jingkhluit khlieh namar ka jingiania ba kynsan bad ba uta u nongleh ia ka kam um shym la shim kabu ne leh runar, ne leh ha ka rukom ba pher ne khyllah.”

14. Ka sakhi ba la ai da ka ktien jong ki san ngut ki nongtrei kiba don ha kata ka jaka trei kam ha Amkhrieh ha ka 14 tarik u Nohprah 2016, ryngkat bad u nongmudui hangne, bad uta u ba la shahpyniap, lah ban iohi namar ka sakhi jong kine ki san ngut ki nongsakhi kiba iohi markhmat, ki pyni ia kaei kaba jia kaba la ialam ia u nongmudui ba un pom ne mait ia la u para da ka *wait lyngkut*. Ka sakhi jong u PW 3 u Krister Nongrang ka dei kaba shai tam bad kata ka sakhi jong u la kyrshan bad pynshisha da ki sakhi jong PW 4 u Phrik Warjri, PW 5 u Kyntli Kharsyntiew, PW 6 u Salesh Lawriniang bad PW 7 u Raju Rana.

15. Katkum u PW 3, jan baroh ki nongbylla ha ka jaka trei ha Amkhrieh, kynthup ia uta uba la shahpyniap bad u nongmudui, ki la ia dih kyiad bad la mih ka jingiatim bad jingiapyni nia hapdeng kita shi para u Spelling Kurbah uba long u nongmudui hangne bad u Bartu Kurbah uba long uta uban sa shahpyniap. U PW 3 u la kam ba uta uban sa shah pyniap u iai pyndom ia u nongmudui da kaba khot ia u *u masi dap* bad u nongmudui u la kyrpad ia u ba un sangeh. Haba uta uban sa shah pyniap um shim la treh ban sngap, u nongmudui u la ioh ia ka *wait lyngkut* kaba don hajan bad u pyrshang ban mait ia la u para. U Raju u don hajan bad u la wan hapdeng jong ki bad knieh ia kata ka tiar na u nongmudui, bad u la buh ia ka ha madan hajan jong ka jaka ba ka don nyngkong por ba shim u nongmudui.

16. Ka dei sa ka sakhi jong u PW 3 kaba long kaba kham kongsan, namar ka pyni shai ia ka rukom ba jia ka jingjia kumba ka dei bad ka long kongsan bha ban pynshongnongrim lada kata kam be-ain ka hap ne em hapoh kino kino kita ki mat kyrpang ba lah dep batai hapoh kyndon ain ba 300 jong ka Indian Penal Code.

“La don ka jingiadat hapdeng uta uba shahpyniap bad u nongshahmudui. U nongshahmudui u la lah ban shim biang ia kata ka *dao* bad mait na ka ryndang uta uba la shahpyniap.”

17. U PW 3 nangta u iathuh shuh shuh ba hadien ba u nongmudui u la mait ia u nongshahpyniap, u para ba ia trei lang u Phrik u la phah ia u nongmudui ba un tap ia kata ka jaka ba mong namar ba phlei ka snam, ha kaba u nongmudui u la “tap ia kata ka jaka ba mong ba mih ka snam da ka kombor ba rong jngum (blue).” U nongmudui hadien kata u aiti noh ia la ka mobile ha u PW 3 bad u kyrpad ia u PW 3 ba un phone taksi bad ba un iathuh ha ka para/hymmen kynthei jong u nongmudui ia kaei kaba la jia. U PW 3 u la iathuh ha ka jingshah tohkit ba baroh arngut, kata u nongmudui bad uta uba la shahpyniap ki la ia buaid bad ki iakajia halor i daw iba rit.

18. U PW 4 u pynshisha katto katne ia kaei kaba u PW 3 u la batai, hynrei um shym la batai bniah than. U PW 4 u iathuh biang ba u nongmudui u la tap ia ka jaka ba mong jong u nongshahpyniap da ka kombor bad haba u la sngewthuh ba u nongshahpyniap u la khlad, “U la shong bad u la sdang ban iam”. U PW 5 u pynthikna ba baroh arngut, kata u nongmudui bad u nongshahpyniap ki ia buaid ha kata ka por. U PW 6 u kynmaw ha ka por ba u ai ia la ka jingsakhi hakhmat ka iingbishar, ba watla hadien ba u nongmudui u la jai jai, haba u la dep ban pyrshang mait ia la u para da ka *wait lyngkut* ha ka sien ba nyngkong, u nongshahpyniap u lah sdang biang ia kata ka jingia nia kaba la pynlong ia u nongmudui ba un bitar. U PW 7 u pynshisha ba u nongshahpyniap u iai pyndom shi pyndom ia u nongmudui haduh ba u nongmudui um lah shah shuh.

19. Katkum ka jingbatai kita kiba iatreilang shaphang kata ka jingjia, ka pyni ba la don ka jingpyndom na u nongshahpyniap namar ba u la sngewdom na ka daw ka jingshah pynshrai. Lada u Raju um shym la lah ban pynsangeh ia u nongmudui ha ka sien ba nyngkong, ia kane ka jingjia la lah ban pynngat hapoh kata ka mat kyrpang ba nyngkong jong ka kyndon ain kaba 300 jong ka Indian Penal Code, ba hap hapoh ka jingpynthikna lada ka jingpynshit ne jingpyndom ka long kaba ma bad kaba kynsan kynsan. Ka long ka jingshisha ba ka jingpyndom u nongshahpyniap ia u nongmudui ka long kumba pyni jain saw ia u masi kyrkong bad dei ban kynmaw ba u nongmudui u lah ban dang don hapdeng ka jingbuaid ha kata ka por.

20. Hynrei, hadien ba khlem sei soh ha ka sien ba nyngkong ba u nongmudui u mut ban mait ia u nongshahpyniap, u nongshahpyniap u iai shi iai pyndom ia u nongshahmudui, ha kaba, katkum u PW 3, la mih ka jingiakajia bad jingiakynroi hapdeng jong kine ar ngut, bad hapdeng kata ka jingiakajia, u nongmudui u lah shim ia kata ka tiar bad mait iap ia la u para. Kane ka pynngat ia kane ka jingjia hapoh ka thup jong ka mat kyrpang ba saw hapoh ka kyndon ain ba 300 jong ka Indian Penal Code ha kaba la don ka jingiashoh ba kynsan na ka daw ka jingkiew khluit namar ka jingiakajia ba kynsan, bad ym don jingpynshisha ba u nongmudui u ioh jingmyntoi eiei na kane ka jingleh, ne u leh runar ne ha ka rukom ba pher ne khyllah.

21. Ha kane ka mokotduma kaba mynta, ki sakhi ki pyni shai ba ka don ka jingiakajia hapdeng kine arngut shipara halor ka jingpyndom bad jingpynshit uta uban sa shah pyniap ia u nongmudui bad ka jingbymtreh jong u ban sangeh nalor ka jingkyrpad u nongmudui. Na ka daw ka jingshah pyndom ba khlem sangeh pyrshah ia u nongmudui, ha ka jingkiew jingdom, u nongmudui u la kynroi ia u nongshahpyniap, kine ar ngut ki lah poi iashoh bad u nongmudui u la shim ia ka tiar ba don hajan jong u kaban pynmysaw ia u nongshahpyniap khnang ban pynsangeh

ia ka jingpyndom u nongshahpyniap. Ka shu leit jia ryngkhat ba ka tiar ba don hajan kaba u nongmudui u ioh ban shim ka long kata ka *wait lyngkut*.

22. Ka kyndon ain kaba 304 jong ka Penal Code ka batai shai ia ka jingiapher hapdeng ki ar bynta jong ka. Ka jingiapher ka shong ha kaba lada ia kata ka kam be-ain la leh da kaba don ne ym don jingthmu ban pyniap ne pynmysaw jur ha ki dkhot met ba lah ban ialam sha ka jingiap. Namarba ka long ka tiar ot ba nep, kaba la shim bad kum kata ka tiar la talain biang ha ka sien ba ar hadien ba la shah knieh noh ha ka sien kaba nyngkong na ka kti u nongmudui, imat na ka daw ka jingkiew jingdom, u nongmudui u lah ban don ka jingthmu ban pyniap ne pynmysaw jur ha ki dkhot met ba lah ban ialam sha ka jingiap. Lada ka tiar ba pyndonkam ka dei u dieng lane kano kano ka tiar bym da shyrkhei, u nongmudui u lah ban ioh ka jingmyntoi hapoh ka bynta ba ar jong ka kyndon ain ba 304 jong ka Penal Code.

23. Ka jingshisha ba u nongmudui u hap ban sngewthuh ne don jingtip, watla ha ka jingdom ba ka *wait lyngkut* ka dei ka tiar ot ba nep kaba lah ban pyniap ia u briew, ryngkat bad ka jingshisha ba u nongmudui u mait na ryndang jong u nongshahpyniap, kan nym ai ka jingioh jingmyntoi ia u nongmudui, kaban pynlong ia u ba un ioh ia ka jingpynshitom bym da jur namar ka kam be-ain bym da jur, kaba hap hapoh ka bynta ba ar jong ka kyndon ain kaba 304 jong ka Penal Code.

24. Ka iing tian bishar ka la bakla ha kaba kam shym lah pynwandur ia ka jingjia ne ka kam ba la leh u nongshahpyniap kaba lah ban pynshit ia u nongmudui bad ka ban pynlong ia u nongmudui ba un talain ia ka tiar pyrshah ia u nongshahpyniap. Ka iing tian bishar ka la shu shaniah beit ha ki sakhi jong ki doktor, ban pyn shong nia da ki nongbishar naduh ka por ba dang lah ban mudui wat haduh ka jingmudui ba kham halor, hynrei ha kaba kita ki sakhi ba lah ioh lum kim iahap eiei bad ka jingpeit kam kaba mynta. Kam dei ka jingleh u nongmudui ba u khlem shym la mait ne pom ia u nongshahpyniap, hynrei ka dei ka jingmait ne jingpom ba lah leh na ka daw ka

jingkiew jingdom bad ka bor bah kaba u nongmudui u lah ban sei ha kata ka por. Ka jingmait ka dei na ka ryndang bad da ka jingsei bor rangbah jong uno uno u shynrang uba ju mlien ban trei bylla, kan batai ia ka jingkhain kata ka jingmait bad ka jingmynsaw kaba mih na kata. Hynrei ym don jingpynshisha ba u nongmudui u nang iai mait ne pom hadien ba u lah dep mait ha ka sien nyngkong.ha ka jingshisha ki sakhi ki pyni ba u nongmudui u lah ban sngewthuh ia ka jingbakla bakhraw na kata ka jingleh bieit kaba palat jong u, ha kaba u nongmudui u la pyrshang ban pynsangeh ia ka jingtuid ka snam bad haba u iohi ba ka jingpyrshang jong u ka long lehnohei,u la iam halor kata ka jingpynmynsaw kaba u la wanlam halor u para lajong.

25. Ym don jingartatien ba ka jingleh kam be-ain kaba shyrkhei bha la jia,bad ha kajuh ruh ka por ym don jingartatien ba kan don kano ka jingthmu ne kam runar ne jinglong ba pher ka ban pynlong ia u nongmudui ba un duh ia ki jingmyntoi kiba hap hapoh ka mat kyrpang ba 4 jong ka kyndon ain ba 300 jong ka Penal Code.

26. Haba shim ia ka jinglong jingman jong kata ka jingjia bad ka jingshisha ba u nongmudui ha ka sien ba nyngkong u la shah knieh noh ia ka tiar, bad hadien u la shim biang ban leh ia ka kam be-ain, ka jingpynshitom kaba u nongmudui u dei hok ban ioh ka dei ban long kaba jur; hynrei ka jingpynshitom ha kane ka mokotduma kan ym long katkum ka kyndon ain ba 302 jong ka Penal Code, watla ka jingpynshitom ba jur tam hapoh ka bynta ba nyngkong jong ka kyndon ain ba 304 jong ka Penal Code ka dei ka jingshahset phatok ba shi jingim. Hynrei ha ba peit ia ka jinglong jingman ha kaba iadei bad ka jingleh u nongmudui hashwa bad hadien ba u la leh ia ka kam, kumta, ka jingset phatok ba 10 snem ka long kaba biang.

27. Kumta, ka jingrai pynshitom ha ka 30 tarik u Iaiong 2019 bad ka rai ba la dep ai la pynkylla noh. La shim ba ia ka kam be-ain ba la leh da u nongmudui hangne,ka dei ka jingleh ia ka kam ba lam sha ka jingiap (culpable homicide) ym ka kam pyniap briew (murder) bad ia kane

la pynhap hapoh ka mat kyrpang ba saw jong ka Kyndon Ain ba 300 jong ka Penal Code. Shuh shuh, haba peit ia ka jinglong jingman jong ka jingjia bad ka jingshisha ba u nongmudui u la leh ia ka kam namar ka jingdom bad ym shym la don ka jingleh runar ne jinglong kaba pher,ia ka jingpynshitom ba la ngat la pynduna sha ka 10 snem ka jingshah set phatok. Halor ka jingshah set phatok kaba 10 snem, u nongmudui um donkam ban siew ia kano kano ka bai dain kuna.

28. Ia ka Crl.A.No.22 jong u 2019 lah pynkut noh.

29. Ia ka kopi jong kane ka rai bad ka hukum la dei ban pynpoi shi syndon sha u nongmudui khlem kano kano ka jingsiew.

(W.Diengdoh)
Nongbishar

(Sanjib Banerjee)
Nongbishar ba ha khlieh duh

Meghalaya
15.03.2022

